



TEKS KHUTBAH JUMAAT
AGENCI ANTIDADAH KEBANGSAAN
KEMENTERIAN DALAM NEGERI
SEMPENA HARI ANTIDADAH KEBANGSAAN
18 FEBRUARI 2022

TAJUK KHUTBAH:

"BAHAYA PENYALAHGUNAAN DADAH, LEBIH BAIK CEGAH"

الْحَمْدُ لِلَّهِ الْقَائِلِ: وَلَا تُلْقُوا بِأَيْدِيكُمْ إِلَى التَّهْلُكَةِ وَأَحْسِنُوا إِنَّ اللَّهَ يُحِبُّ الْمُحْسِنِينَ.
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ الْمَلِكُ الْحَقُّ الْمُبِينُ،
الَّذِي فَضَّلَ نَبِيَّنَا مُحَمَّدًا عَلَى جَمِيعِ الْأَنْبِيَاءِ وَالْمُرْسَلِينَ،
وَأَشْهَدُ أَنَّ نَبِيَّنَا مُحَمَّدًا عَبْدُهُ وَرَسُولُهُ أَفْضَلُ الْخَلْقِ أَجْمَعِينَ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ نِالَامِينَ، وَعَلَى آلِهِ وَصَحْبِهِ الطَّيِّبِينَ
الطَّاهِرِينَ، وَعَلَى التَّابِعِينَ لَهُمْ بِإِحْسَانٍ إِلَى يَوْمِ الدِّينِ. أُوصِيكُمْ وَنَفْسِي بِتَقْوَى
اللَّهِ تَعَالَى، اتَّقُوا اللَّهَ حَقَّ تُقَاتِهِ، فَقَدْ قَالَ تَعَالَى: يَا أَيُّهَا الَّذِينَ آمَنُوا اتَّقُوا اللَّهَ
وَلْتَنْظُرْ نَفْسٌ مَّا قَدَّمَتْ لِغَدٍ ۖ وَاتَّقُوا اللَّهَ ۚ إِنَّ اللَّهَ خَبِيرٌ بِمَا تَعْمَلُونَ.

Sidang Jumaat yang dirahmati Allah sekalian.

Pada hari yang mulia serta penuh dengan keberkatan ini, marilah kita meningkatkan ketakwaan kepada Allah **سُبْحَانَهُ وَتَعَالَى** dengan menjunjung segala suruhan dan meninggalkan segala larangan-Nya. Mudah-mudahan dengan ketaqwaan kepada-Nya, kita akan memperoleh keselamatan hidup di dunia dan akhirat.

Bersempena dengan sambutan Hari Antidadah Kebangsaan yang disambut pada **19 Februari** setiap tahun, maka mimbar pada hari ini akan membicarakan khutbah Jumaat yang bertajuk “**Bahaya Penyalahgunaan Dadah, Lebih Baik Cegah**”

Sidang Jumaat yang dirahmati Allah sekalian,

Sesungguhnya Kerajaan melalui Kementerian Dalam Negeri menitikberatkan aspek keselamatan dan ketenteraman negara sebagai salah satu teras memulihkan negara khususnya bagi memperkukuh penguatkuasaan keselamatan seterusnya mengurangkan kadar jenayah di Malaysia.

Saban hari kita sering diperdengarkan dengan berlakunya kes jenayah khususnya dalam penyalahgunaan dadah yang menjadi punca kepada permasalahan sosial yang lain. Sehingga September 2021, Agensi Antidadah Kebangsaan (AADK) telah merekodkan seramai lebih daripada 114,000 orang yang terlibat dalam penyalahgunaan dadah. Malangnya, 79 peratus daripada jumlah tersebut adalah bangsa Melayu yang beragama Islam. Data turut menunjukkan, daripada 100,000 orang penduduk terdapat seramai 394 orang yang terlibat dengan penyalahgunaan dadah.

Andai ini berterusan, bagaimana matlamat Aspirasi Keluarga Malaysia akan tercapai? Sekiranya ketagihan dadah, kerosakan akhlak dan lain-lain anasir buruk berlaku dalam masyarakat kita. Ingatlah amaran Allah **سُبْحَانَهُ وَتَعَالَى** dalam surah Al-Baqarah ayat 195 yang dibaca di awal khutbah tadi yang bermaksud:

”Dan janganlah kamu sengaja mencampakkan diri kamu ke dalam kebinasaan dengan tangan sendiri, dan berbuat baiklah. Sesungguhnya, Allah menyukai orang-orang yang berbuat baik.”

Sidang Jumaat yang dirahmati Allah sekalian.

Dalam mencapai Aspirasi Keluarga Malaysia yang berjaya, benteng kepada gejala yang merosakkan generasi akan datang perlu diperkukuhkan secara bersungguh-sungguh melalui usaha pencegahan seperti berikut:

Pertama : Peranan Ketua Keluarga.

Bapa atau Ibu sebagai ketua keluarga mendokong amanah dan tanggungjawab daripada Allah **سُبْحَانَهُ وَتَعَالَى** untuk membimbing anak-anak agar berpegang teguh dengan akidah Islam, melazimi ibadah secara berjemaah serta berakhlak mulia disamping memastikan persekitaran keluarganya yang sihat dan sejahtera. Sabda Rasulullah **صَلَّى اللَّهُ عَلَيْهِ وَسَلَّمَ**:

**كُلُّكُمْ رَاعٍ وَمَسْئُولٌ عَنْ رَعِيَّتِهِ، فَالْإِمَامُ رَاعٍ وَهُوَ مَسْئُولٌ عَنْ رَعِيَّتِهِ
وَالرَّجُلُ فِي أَهْلِهِ رَاعٍ، وَهُوَ مَسْئُولٌ عَنْ رَعِيَّتِهِ**

Maksudnya: ”Setiap daripada kalian adalah pemimpin dan bertanggungjawab terhadap pimpinannya, seorang imam (ketua negara) adalah pemimpin dan dia bertanggungjawab terhadap rakyatnya dan seorang lelaki dalam keluarga adalah pemimpin dan bertanggungjawab terhadap pimpinannya (ahli keluarganya).” ﴿Hadis Riwayat Imam al-Bukhari﴾

Ketua Keluarga mestilah prihatin dan cakna ke atas setiap perkembangan atau perubahan anak-anak serta menjadi sahabat kepada mereka. Perkara ini amat penting kerana Islam mengajar kaedah dalam mendidik anak-anak supaya mereka terpelihara daripada anasir yang tidak baik. Rasulullah **صَلَّى اللَّهُ عَلَيْهِ وَسَلَّمَ** bersabda yang bermaksud:

"Daripada Amr bin Syu'aib, daripada bapanya, daripada datuknya, katanya: Rasulullah ﷺ bersabda: Perintahkanlah anak-anak kamu supaya mendirikan solat ketika berusia tujuh tahun dan pukullah mereka kerana meninggalkan solat ketika berumur sepuluh tahun dan asingkanlah tempat tidur di antara mereka (lelaki dan perempuan).

﴿Hadis Riwayat Imam Abu Daud﴾

Andainya ada di kalangan ahli keluarga kita yang tersasar, usahalah untuk merawat pulih mereka dan janganlah cepat menghukum. Teruskan memberi sokongan agar mereka dapat bangkit dan berusaha untuk kembali ke pangkal jalan. Agensi Antidadah Kebangsaan (AADK) menyeru kepada semua yang telah terlibat dengan penyalahgunaan dadah untuk mendapatkan rawatan dan menjalani proses pemulihan secara sukarela sama ada di fasiliti yang disediakan oleh kerajaan ataupun pihak swasta. Sementara itu, operasi penguatkuasaan juga tetap diteruskan agar kumpulan ini dapat segera dikesan untuk dirawat dan dipulihkan sewajarnya.

Kedua: Menolak dan mencegah perkara-perkara yang diharamkan oleh Islam untuk menjaga tubuh badan daripada kelemahan dan kerosakan.

Allah telah memberi batasan tertentu kepada hawa nafsu kita agar tidak memilih sesuatu yang diharamkan lagi memudaratkan. Pengambilan alkohol, menghisap vape, merokok dan perbuatan-perbuatan lain yang haram, lebih-lebih lagi penyalahgunaan dadah akan mengakibatkan kesan buruk dan mudarat yang amat besar kepada individu penagih itu. Bahkan kerosakan ini mencakupi kerosakan kepada agama, bangsa dan negara memandangkan mereka adalah aset berharga kepada masyarakat.

Firman Allah ﷻ dalam surah Al-Maidah, Ayat 90 :

يَا أَيُّهَا الَّذِينَ ءَامَنُوا إِنَّمَا الْخَمْرُ وَالْمَيْسِرُ وَالْأَنْصَابُ وَالْأَزْلَمُ رِجْسٌ مِّنْ عَمَلِ الشَّيْطَانِ

فَاجْتَنِبُوهُ لَعَلَّكُمْ تُفْلِحُونَ

Maksudnya: “Wahai orang-orang yang beriman! Bahawa sesungguhnya arak dan judi dan pemujaan berhala dan mengundi nasib dengan batang-batang anak panah, adalah (semuanya) kotor (keji) dari perbuatan Syaitan. Oleh itu hendaklah kamu menjauhinya supaya kamu berjaya.”

Sewajarnya juga kita ambil tahu bahawa pada masa ini terdapat pelbagai jenis dadah yang mengkhayalkan dan memudharatkan dalam bentuk serbuk, cecair dan pil seperti heroin, morfin, opium, ganja, pil kuda dan syabu yang terdapat di pasaran gelap negara kita.

Sehubungan itu, mimbar ingin mengingatkan semula bahawa Muzakarah Jawatankuasa Fatwa Majlis Kebangsaan bagi Hal Ehwal Ugama Islam Malaysia Kali Ke-76 turut membincangkan Hukum Penyalahgunaan Dadah dan telah memutuskan bahawa penyalahgunaan dadah adalah haram dan semua aktiviti yang berkaitan dengan penyalahgunaan dadah ini seperti menanam, memproses, memiliki, menjual, mengedar, membeli atau membenarkan premis digunakan untuk bersubahat dengan penggunaannya adalah juga diharamkan.

Ketiga: Keprihatinan dan kebersamaan dalam masyarakat.

Setiap ahli masyarakat mestilah mewujudkan hubungan yang baik dan jalinan yang erat. Sikap ambil peduli terhadap persekitaran perlu sentiasa dipertingkatkan agar permasalahan sosial seperti penagihan dadah dapat dicegah lebih awal. Sebagai anggota masyarakat yang prihatin, hendaklah berganding bahu dan mengambil langkah-langkah yang proaktif bagi membendung gejala sosial daripada terus membarah. Bertegaslah dengan mengambil tindakan yang sewajarnya seperti menegur, menasihati atau melaporkan kepada pihak yang bertanggungjawab. Rasulullah ﷺ bersabda dalam hadis yang diriwayatkan oleh Imam Muslim yang bermaksud:

”Daripada Abu Said Al-Khudri رَضِيَ اللَّهُ عَنْهُ beliau berkata: Aku mendengar Rasulullah

ﷺ bersabda: Sesiapa di kalangan kamu yang melihat kemungkaran

hendaklah dia mengubahnya dengan tangan, sekiranya dia tidak mampu hendaklah

mengubahnya dengan lidah, sekiranya tidak mampu hendaklah dia mengubah dengan hati dan mengubah dengan hati adalah selemah-lemah iman.”

Oleh itu, masyarakat perlu peka dengan perkara yang berlaku disekelilingnya. Dalam menangani masalah penyalahgunaan dadah, usaha satu pihak sahaja seperti AADK tidak mencukupi. Kerjasama secara bersepadu daripada pelbagai pihak terutamanya ahli komuniti setempat perlu digerakkan. Antara usaha yang dapat dilakukan adalah dengan segera melaporkan kepada pihak berkuasa seperti Polis dan AADK yang berhampiran sekiranya terdapat aktiviti yang meragukan.

Sidang Jumaat yang dirahmati Allah sekalian.

Antara penghayatan yang boleh dijadikan pedoman melalui khutbah pada hari ini ialah:

Pertama : Institusi kekeluargaan yang harmoni akan menghindarkan masyarakat daripada terjebak ke dalam gejala yang tidak sihat seperti penyalahgunaan dadah.

Kedua : Umat Islam hendaklah memastikan setiap perkara yang dilakukan dan digunakan adalah bersumberkan yang halal serta menepati syariat Islam.

Ketiga : Masyarakat hendaklah bertanggungjawab dan saling bekerjasama dalam memastikan kesejahteraan dan keharmonian masyarakat agar terpelihara daripada anasir negatif.

Keempat : Umat Islam hendaklah sentiasa berdoa dan berusaha membimbing anak-anak dan anggota masyarakat agar terhindar daripada aktiviti yang tidak sihat seperti penagihan dadah. Ingatlah, Lebih Baik Cegah! sebagaimana pepatah Arab menyebutkan.

الْوَقَايَةُ خَيْرٌ مِّنَ الْعِلَاجِ

Maksudnya: Mencegah itu lebih baik daripada mengubati.

أَعُوذُ بِاللَّهِ مِنَ الشَّيْطَانِ الرَّجِيمِ

يَا أَيُّهَا الَّذِينَ ءَامَنُوا قُوا أَنْفُسَكُمْ وَأَهْلِيكُمْ نَارًا وَقُودُهَا النَّاسُ وَالْحِجَارَةُ عَلَيْهَا مَلَائِكَةٌ
غِلَاطٌ شِدَادٌ لَا يَعْصُونَ اللَّهَ مَا أَمَرَهُمْ وَيَفْعَلُونَ مَا يُؤْمَرُونَ

Maksudnya: "Wahai orang yang beriman! Peliharalah diri kamu dan keluarga kamu dari api Neraka yang bahan bakarannya manusia dan batu; Penjaganya malaikat-malaikat yang keras kasar; tidak menderhaka kepada Allah dalam segala yang diperintahkan-Nya kepada mereka, dan mereka pula tetap melakukan segala yang diperintahkan."

﴿Surah At-Tahrim:6﴾

بَارَكَ اللَّهُ لِي وَلَكُمْ فِي الْوَحْيَيْنِ، وَنَفَعَنِي وَإِيَّاكُمْ بِمَا أُنْزِلَ عَلَى سَيِّدِ الثَّقَلَيْنِ، وَتَقَبَّلَ
مِئِّي وَمِنْكُمْ طَاعَتَهُ لِسَعَادَةِ الدَّارَيْنِ، أَقُولُ مِنْ قَلْبِي الْحَنِينِ، وَأَسْتَغْفِرُ اللَّهَ الْعَظِيمَ
لِي وَلَكُمْ أَجْمَعِينَ، وَلِسَائِرِ الْمُسْلِمِينَ وَالْمُؤْمِنِينَ، الْأَحْيَاءِ مِنْهُمْ وَالْمَيِّتِينَ،
فَاسْتَغْفِرُوهُ يَا فَوْزَ الْمُسْتَغْفِرِينَ، وَأَنْتَ أَرْحَمُ الرَّاحِمِينَ.



Khutbah Kedua Bulan Februari

2022M/ 1443H

الْحَمْدُ لِلَّهِ عَلَى آلائِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِحُشْنِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ،
وَأَعْمَلُوا بِطَاعَتِهِ وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ
بِنَفْسِهِ؛ فَقَالَ - عَلِيمًا حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا ﴿٥٦﴾

[الأحزاب: 56]

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ، الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ إِلَى
يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أَيْمَتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.
اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Al-Sultan Abdullah Ri'ayatuddin Al-Mustafa Billah Shah Ibni

Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Hajah Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبُ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ اذْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطُنَ، عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجَذَامِ وَمِنْ سَيِّئِ الْأَسْقَامِ، يَا أَرْحَمَ الرَّاحِمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf.

Ya Allah! Berilah petunjuk-Mu kepada kami, pemuda-pemuda kami, pemimpin-pemimpin kami untuk memberikan khidmat bakti yang terbaik kepada agama, bangsa dan negara.

Ya Allah! Kau hindarilah kami daripada perbuatan-perbuatan khianat dan durjana yang merosakkan kepentingan agama, masyarakat dan negara.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٦٠﴾
فَاذْكُرُوا اللَّهَ الْجَلِيلَ يَذْكُرْكُمْ، وَاشْكُرُوهُ عَلَى نِعَمِهِ يَزِدْكُمْ،
وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٦١﴾